



13. august 2010

UKA 2010/34

Inatsisartut Suleriaasianni § 32 naapertorlugu aalajangiiffigisassatut siunnersuut imaattoq matumuuna saqqummiuppara:

Pisinnermut inatsisip nutarterneqarnissaanut imaluunniit pisap Kalaallit Nunaannut nuunneqarnissaanut taamatullu nammineq malittarisassiuussisinnaalernissamut siunertaqartumik Naalackersuisut danskit naalagaaffiannut saaffigineqqullugit peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Naaja Nathanielsen, Inuit Ataqatigiit)

Tunngavilersuut:

Kunngikkormiut peqqussutaasigut danskit pisinnermut inatsisaata Kalaallit Nunaanni atuutsinneqalermalli pisorpassuaqarsimavoq. Taamaniilli danskit atuisartut atugaat pitsanngorsaavigineqarput, inatsillu pisiffissat periarfissallu nutaat takkuttuarneri naapertorlugit nutarterneqartarsimavoq, soorlu tusagassiutini atortut digitaliusut eqqarsaatigalugit. Ullumikkut nipilersugarpasuit digitalimik pisarineqartarput. Kalaallit nipilersugaasa nunarsuatta sinneranut tuniarneqarsinnaanerat eqqarsaatigigaanni soorlu iTunes-ip aqutigineqarsinnaanera tulluurtuuvog.

Ullumikkulli tamanna Kalaallit Nunaanni imminut akilersinnaangilaq inatsisitigut nutaangilisoqarsimanera pissutigalugu. Nunami maani pisisoq pisereermermi utertitsinissamut pisinnaatitaaffeqarpoq. Pisiarli digitaliuppat pisinnaatitaaffik taanna isumaqangilaq, tassami pisisoq kopimik digitaliusumik sulii tiggumiaqarsinnaassammat.

Danskit pisinnermut inatsisaanni maanna atuuttumi utertitsisinnaanermut pisinnaatitaaffinnut pisiat digitaliusut ilaatinneqangillat. Pisinnermut inatsisip nutarterneqarneratigut imaluunniit pisap Nunatsinnut nuunneqarneratigut pisinnermut tunisinermullu tunngasutigut ullutsinnut naleqquttumik aqqissuussinissatsinnut periarfississaagut. Tamanna ilaatigut ima kinguneqassaaq pisisoq utertitsinissamut sivisunerusumik piffissalernerqassammat, tamannami inatsisip Kalaallit Nunaanni atuutsinneqalereernerata kingorna danskinut ilanngunneqareersimammat.

Aamma eqqarsaatigineqarsinnaavoq Kalaallit Nunaannut pitsaanerussannginnersoq pisaq danskit naalagaaffianniit maanga nuukkaanni. Danskit pisinnermut inatsisaat ilaatigut EU-mi maleruaqqusanut naleqqussagaavoq. Tamannalu Kalaallit Nunaannut tamatigut attuumassuteqangilaq. Pisamut oqartussaaffik nuukkutsigu immaqa inuiaqatigiinni pissutsit aallaavigalugit inatsimmik ilusilersuisinnaangornerussaagut.